

Apelacioni sud Brčko distrikta Bosne i Hercegovine u vijeću sastavljenom od sudija Damjana Kaurinović, kao predsjednika vijeća i sudija Ilje Klaić, Ruže Gligorević, Maide Kovačević i Srđana Nedić, kao članova vijeća, u postupku ocjene usklađenosti pravnih akata Brčko distrikta Bosne i Hercegovine, postupajući po inicijativi J.M. iz B., koju zastupa punomoćnik Dragan Oparnica, advokat iz Brčkog, na osnovu člana 33. stav 3. Zakona o postupku ocjene usklađenosti pravnih akata Brčko distrikta Bosne i Hercegovine („Službeni glasnik Brčko distrikta BiH“, broj 20/10), na sjednici vijeća održanoj dana 03.06.2014. godine, d o n i o j e

## R J E Š E N J E

ODBACUJE SE inicijativa za pokretanje postupka za ocjenu usklađenosti tačke g. opštih uslova sadržanih u Javnom konkursu za izbor kandidata za članove Upravnog odbora Zavoda za zapošljavanje Brčko distrikta BiH, broj predmeta: 48-001801/13, broj akta: 01.8-0161IV-0010/14 od 17.01.2014. godine, sa članom 13. Statuta Brčko distrikta Bosne i Hercegovine („Službeni glasnik Brčko distrikta BiH“, broj 2/10), sa odredbama člana 5. stav 1. i člana 43. Zakona o zapošljavanju i pravima za vrijeme nezaposlenosti Brčko distrikta BiH („Službeni glasnik Brčko distrikta BiH“ broj 33/04, 19/07 i 25/08) i odredbom člana 3. stav 1. Zakona o krivičnom postupku Brčko distrikta BiH („Službeni glasnik Brčko distrikta BiH“ broj 34/13).

ODBACUJE SE prijedlog za obustavu izvršenja Javnog konkursa za izbor kandidata za članove Upravnog odbora Zavoda za zapošljavanje Brčko distrikta BiH, broj predmeta: 48-001801/13, broj akta: 01.8-0161IV-0010/14 od 17.01.2014. godine.

## Obrazloženje

Dana 03.02.2014. godine J.M. iz B., koju zastupa punomoćnik Dragan Oparnica, advokat iz Brčkog, podnijela je inicijativu za ocjenu usklađenosti tačke g. opštih uslova sadržanih u Javnom konkursu za izbor kandidata za članove Upravnog odbora Zavoda za zapošljavanje Brčko distrikta BiH, broj predmeta: 48-001801/13, broj akta: 01.8-0161IV-0010/14 od 17.01.2014. godine, sa članom 13. Statuta Brčko distrikta Bosne i Hercegovine, te sa odredbama člana 5. stav 1. i člana 43. Zakona o zapošljavanju i pravima za vrijeme nezaposlenosti Brčko distrikta BiH i odredbom člana 3. stav 1. Zakona o krivičnom postupku Brčko distrikta BiH.

U inicijativi se navodi da osporavani konkurs sadrži ograničavajući opšti uslov, a to je da se protiv kandidata ne vodi krivični postupak, što je u suprotnosti sa članom 13. Statuta Brčko distrikta Bosne i Hercegovine, te sa odredbama člana 5. stav 1. i člana 43. Zakona o zapošljavanju i pravima za vrijeme nezaposlenosti Brčko distrikta BiH i odredbom člana 3. stav 1. Zakona o krivičnom postupku Brčko distrikta BiH. Dalje je navedeno da se protiv podnosioca inicijative vodi krivični postupak, zbog čega njena kandidatura za člana Upravnog odbora Zavoda za zapošljavanje Brčko distrikta BiH, zbog primjene navedenog opšteg uslova ne bi bila

prihvaćena. Podnosilac inicijative predlaže da se do donošenja konačne odluke, obustavi izvršenje osporavanog akta.

Članom 1. Zakona o postupku ocjene usklađenosti pravnih akata Brčko distrikta BiH određen je predmet postupka i propisano sledeće:

„(1) Ovim zakonom uređuje se postupak ocjene usklađenosti pravnog akta Brčko distrikta Bosne i Hercegovine (u daljnjem tekstu: pravni akt) sa Statutom Brčko distrikta Bosne i Hercegovine (u daljnjem tekstu: Statut), zakonom Brčko distrikta Bosne i Hercegovine (u daljnjem tekstu: zakon Distrikta) i postupak sukoba nadležnosti između institucija i organa Brčko distrikta Bosne i Hercegovine (u daljnjem tekstu: Distrikt).

(2) Ne može se voditi postupak ocjene usklađenosti upravnog akta ili drugog pojedinačnog pravnog akta, osim ako zakonom nije osigurano pravo na žalbu, sudska zaštita ili drugi vid pravne zaštite.“

Polazeći od činjenice da osporavani pravni akt ima drugi vid pravne zaštite koji se ostvaruje pobijanjem odluke o izboru kandidata po predmetnom konkursu i konačno osigurano sudska zaštitu koja se ostvaruje pokretanjem sudskog postupka pred Osnovnim sudom Brčko distrikta BiH, u skladu sa članom 6. Zakona o upravnim sporovima Brčko distrikta Bosne i Hercegovine, ovaj Sud nalazi da nema osnova za pokretanje postupka povodom inicijative. Naime, tužba kojom se pokreće upravni spor, radi poništenja drugostepenog upravnog akta je djelotvorno sredstvo sudske zaštite koje daje ovlaštenje redovnom sudu da ispita odluku organa uprave u činjeničnom i pravnom pogledu. S druge strane, to znači da će organ koje provodi proceduru za izbor nekog kandidata po predmetnom konkursu morati dokazati da je taj izbor zakonit.

S obzirom da je donesena konačna odluka, odbacuje se zahtjev za obustavu izvršenja akta u skladu sa odredbom člana 36. stav 3. Zakona o postupku ocjene usklađenosti pravnih akata Brčko distrikta Bosne i Hercegovine.

Imajući u vidu navedeno, Sud se, u smislu člana 1. stav 2, a u vezi sa članom 33. stav 3. Zakona o postupku ocjene usklađenosti pravnih akata Brčko distrikta Bosne i Hercegovine, ne može upuštati u meritum spora, zbog čega je odlučeno kao u dispozitivu rješenja.

BOSNA I HERCEGOVINA  
APELACIONI SUD BRČKO DISTRIKTA  
BOSNE I HERCEGOVINE  
Broj: 97 o U 001436 14 Ous  
Brčko, 03.06.2014. godine

PREDSJEDNIK VIJEĆA

---

Damjan Kaurinović

Da je ovaj otpisak rješenja  
saglasan sa izvornikom  
tvrđi i ovjerava pisarnica Suda